

Võrokõisi lipp juusk Contraga läbi Vana Võromaa!

III Uma Pido 1. juunil peetas edimäst kõrda vahtsõltvalitu võrokõisi lipu all. Luulõtajal ja joosumehel Contral om pido tähistämises plaan üts umbõ tükk tetä – lipujuusk läbi katsa Vana Võromaa kihlkunna, kokko 340 kilomeetrit. Juuskminõ nakkas pääle 26. mail Võrolt, kell 11.00 Võro Katariina keriku mant, ja jõud lõpulõ 1. juunil, Uma Pido pääväl, Võron peetävä Keriguplatsi laadamõllü seen.

Contra juusk päämisdelt suuri teie pääl, kohe kõik omma' oodõtu juuskjile lehvitämä. Päält tuu omma' joosutrassi lähkün elävä'-olõva' inemise'-küläseltsi' lahkõlõ oodõtu juuskjile söögipoolist pakma, kõrralik süük om juuskmisõ man väegä tähtsä. Nii om egälütel võimalus anda uma osa lipu Umalõ Pido lõ jõudmisõ man. Tavaperäst spordivõistluisi söögikõrraldust ei tetä'. Kogo toidus võinu olla' Võromaal kasvatõt-valmistõt.

Contra joosumarsruuti saa samal aol kaia' internetist. Link pandas inne juusku üles nii Uma Pido kodolehele (www.umapido.ee), Uma Pido aoraamaduõhe (umapido.wordpress.com) ku ka Facebooki Uma Pido ja Contra konto pääle. Viil saa naidõ lehti päält täpsämbät teedüst joosu plaani kottalõ.

Üten või kah juuskõ, tempo piässi kõigilõ kontõ müüidä olõma ja esi saa valli parra hulga kilomeetrid. Kes juuskmisõst pikembält taht osa võtta – terve päävä vai esiki nädäli, pallõmi Contralõ teedä anda urvaste@gmail.com vai kõlista 5283540.

Planeeritäv tiikund om päivi kaupa sääne:

26. mai: Võro Katariina – Rõugõ – Pärlijõõ – Krabi – Pähni – Varstu

27. mai: Mõnistõ – Saru – Harglõ – Koobassarõ – Lüllemäe – Haabsaarõ – Antsla – Urvastõ

28. mai: Kärgula – Kanepi – Savõrna – Kruutusõ – Ihamaro – Põlva – Mooste

29. mai: Leevaku – Räpinä – Kahkva – Niidsiku – Kaamnitsa

30. mai: Orava – Võmmorski – Obinitsa – Lepä – Meremäe – Kalatsova – Vahtsõliina

30. mai: Kärinä – Misso – Ruusimäe – Plaani – Haani

1. juuni – Võro (kell 12 Keriguplatsi laada lava pääl)

Contra janu kustutas Värskä Vesi ja söögipoolisega tugõva Nopri ja Taarapõllu talu.

Uma Pido om võrokõisi laulu- ja tandsupido, mille päämõtõ om jagada võrokõsõs olõmisõ ni võro keele ja kultuuri tundmisõ rõõmu. Edimäne Uma Pido peeti 2008. aastagal Võrol, tõnõ pido 2010 Põlvan, ni seokõrdne jälleki Kubijal. Peokotussõ jagaminõ Võro ni Põlva maakunnakeskuisi vaihõl näütäs Vana Võromaa üttheoitmist.

Aoluulidsõ Vana Võromaa ala käü katõssa Lõuna-Eesti kihlkunda: Harglõ, Rõugõ, Karula, Vahtsõliina, Kanepi, Urvastõ, Põlva ja Räpinä.